

Ekwo-ozì K'èbo, Pòlu Deru Nù Timoti

1 ¹Oo m̀be Pòlu; onye-ishi-ozì Kéreshi Jizòsù lẹ̀ g'ò b̀ uche Chileke l'ede ẹ̀kwo-a; gẹ̀ mu gude p̄fuaru ndiphe l'ophu k'òkpobe ndz̀ ono, Chileke kweru ukwe lẹ̀ ya e-shi l'ẹ̀ka Kéreshi Jizòsù nù anyi ono.

²Onye mu ede iya anù b̀ g̀be nwa mu ono, mu yeru obu, b̀ Timoti. Gẹ̀ Chileke, b̀ Nna; yẹ̀ Nnajiuphu anyi, b̀ Kéreshi Jizòsù meeru ngu eze-iphe-oma; ph̀kwaaru ngu phò obu-imemini; mekwaphò g'èhu d̀ ngu guu.

Pòlu ekele Chileke bya aad̀kwapho Timoti obu

³Mu etu Chileke ẹ̀pha; mb̀ onye mu gude obu mu g'ò ha ejeru ozì gẹ̀ nna mu oche phẹ̀ jeru iya; ophu ọowadu mu obu mini. Iphe, b̀kpoo tekenteke, mu epfu anù Chileke l'eswe mẹ̀ l'enyashi bẹ̀ mu anyatajẹ̀ tua ya ẹ̀pha l'opfu ẹ̀hu ngu. ⁴Timoti; mu nyatakwaru-a ẹ̀nya-mini ono, ghakashiuru ngu l'ẹ̀nya ono. Ọ̀ buru iphe ono meru g'ò gude oghoroko ngu d̀ mu shii. Mb̀-à; ọ̀ g̀kwa mu g'a sù lẹ̀ mu lẹ̀ ngu humaru ọ̀zo k'òphu ẹ̀hu-utso e-jikwanù mu ọ̀kpoma. ⁵Mu anyatajẹ̀kwa ọ̀kpobe ekwekwe ono, i kweru kẹ̀ Nnajiuphu anyi ono. Ekwekwe ono bẹ̀ ne ngu oche, b̀ Loyisu yẹ̀ nene ngu, b̀ Yunayisu vuhaadaa ngu rọ̀ ọ̀zo kwetaadaa; o dokwaa mu phò ẹ̀nya l'ò nokwaphò gẹ̀ g̀bedua kwetarù. ⁶Noo g'ò gude mu nòdu anyatarù ngu sù g'i mekwaa iphe-oma ono g'ò ree ire; mb̀ iphe-oma ono, Chileke shi l'ẹ̀ka ono, mu byaberu ngu l'ishi nù ngu teke ono, mu pfuru nù Chileke l'opfu ẹ̀hu ngu ono. ⁷Lẹ̀ Unme-dù-Nsò ophu Chileke nuru anyi ta ab̀kwa Unme, l'e-me anyi g'anyi tsuje ebvu. Ọ̀ kwa Unme a-nùje anyi ike bya ab̀ru Unme n-yemobu; bya ab̀ru Unme emejekwaphò g'anyi d̀ ike sedekotaje onwanyi.

⁸Oo ya b̀; g'ò tọ̀ d̀kwa teke iisoje ẹ̀nya epfuru ndiphe l'ì b̀ onye kẹ̀ Nnajiuphu anyi ono. Ophu iphere ẹ̀hu mb̀dua ad̀jekwa ngu; mb̀ mb̀dua ono, a t̀ru mkpòro l'opfu ẹ̀hu Nnajiuphu anyi ono. Iphe, ii-mechia b̀kwa g'i jee òkè iphe-ẹ̀huka nkengu l'iphe-ẹ̀huka ono, anyi eje gude ese

iswi ozi-oma ono. Chileke bẹ e-mekwaa g'ì dū ike ejeje iya. ⁹Ọo Chile-ke ono bẹ bụ onye dzọru anyi; bya ekua anyi oku, dū nsọ ono; ọ tọ bụdu iphe, anyi setarū l'akanya; ọ bụ eze-iphe-oma, bụ iphe, ọ tūbehawaru l'o noo gẹ ya l'eme iya. Ono bụru iphe, ọ gbẹ l'ẹka Kéreshi Jizọsu meeru anyi tẹme mgboko dū. ¹⁰Ọle nta-a bẹ ọ byaru emee: a hūma-dzuru eze-iphe-oma ono; kele Kéreshi Jizọsu ono, bụ Onye-Ndzọta anyi ono bẹ byawaru eliphe-a bya emebyiwaa ike k'anwūhu. Nta-a bẹ o shiwaa l'ozi-oma ono mee g'ahūma-dzuru ndzū ono; mbū ndzū ọphu bụ a -dzūwaru iya; a taa nwūhubaedu anwūhu.

¹¹Ọ bụru iya bẹ a họtaru mu gẹ mu saje àsàsà; mu abụkwarupho onyeshi-ozì iya; bụru onye ezi iphe ezizi. ¹²Ọ kwa iphe ono meru g'o gude mu nọdu ejekotakpoo iphe-ẹhuka-a, mu eje-a; ọphu ọ bụdu l'iphere iya aduje mu; noo lẹ mu maru onye mu kweru nkiya; tẹme o doo mu ẹnya ree l'ọo-dū ike kwakọbe iphe ono, mu yeru iya l'ẹka ono jeye mbọku ono. ¹³Gudeshiẹkwapho ọkpobe-opfu ono, ì nūmaru mu l'ọnu ono; g'ọ bụru iya a-nọdu akpọ-ziru ngu ọzo g'ii-gudeje epfu opfu; kweta iya; nọdu Kéreshi Jizọsu l'ẹka yee nwibe ngu obu. ¹⁴Kwabẹkwaru ẹguru iphe ono, e yeru ngu l'ẹka ono ẹnya. Ọo Unme-dū-Nsọ ono, bu l'ime anyi ono e-me g'ì dū ike letakọta iya ẹnya.

¹⁵?Ọ kwa l'ì maru lẹ ndu Eshiya, g'ẹphe ha bẹ tūkoakwaru g'ẹphe ha gbakashihu parū mu haa; mbū je akpaa lẹ Fayigelosu yee Hemojinizu. ¹⁶Gẹ Nnajiuphu phūaru ndibe Onẹsiforosu obu-imemini; kele o shi anọduje agba mu unme; ọphu iphere mu adujedu iya gẹ mu nọ mkpọro-a. ¹⁷Teke o beberu byarwuta Romu bẹ ọ wataeru mu phọ achọshi ike jeye teke ọ hūmaru mu. ¹⁸Gẹ Nnajiuphu jiko yekwarū iya ẹka; gẹ Chileke phūaru iya obu-imemini mbọku onoya; gūbedua l'onwongu mawaru-a g'o yetaberu mu ẹka lẹ Efesọsu.

Ọkpobe onye ojọgu kẹ Kéreshi

2 ¹Ọo ya bụ; gūbedua, bụ nwa mu; gẹ Chileke mee g'i gude eze-iphe-oma ono, shi l'ẹka Kéreshi Jizọsu ono shihu ike. ²Ì nūmawaru-a iphemiphe ono, mu pfuru l'edzudzu-ọha ono. Woru iya ye l'ẹka ndu goshiwaru l'ẹphe gbaru g'e gude ire phẹ ẹka bụkwanu ndu a-dū ike zikwaa ya phọ ndu ọzo.

³Takwaa nshi jee òkè iphe-ẹhuka nkengu l'opfu ẹhu Kéreshi Jizọsu, bụ iphe, gbaru ọkpobe onye ojọgu kẹ Kéreshi. ⁴Ọ tọ dūkwa onye ojọgu, nọ l'ẹka ọgu ekpo ọku, ewojeru onwiya je eye l'akanya k'eliphe-a; gbahaa g'o mee iphe, dū onye họtaru iya nū ono ree. ⁵Ọzo bụru l'onye agba ọso bẹ e te bujekwa nggo k'onye kachaa agbagba mẹ ọ -būdu l'ọ gbaru iya g'aagba-je iya. ⁶Ọo onye akọ opfu, ejeshi ozi ike bẹ ọ gbaru kẹ g'o vujeru ọzo ria iphe, o metaru l'opfu iya ọbu. ⁷Rìkwaa iphemiphe ono, mu pfuru ono arìri. Gẹ Nnajiuphu yetakwaru ngu ẹka g'iphemiphe dokọta ngu ẹnya.

⁸ Nyatakwa Jizosu Kéreshi ono, Chileke meru: o shi l'õnwu teta dzuru ndzũ ono. Jizosu ono bu eri Dévidi; o buru iphe ono bukotakpoo iphe ozi-õma ono, mu ezi ono epfukpo. ⁹ O kwa l'õo le mu ezi ozi-õma ono meru g'o gude mu nõdu eje iphe-ehuka-a, mu eje-a; g'o bu le mu bu onye meru ejo-iphe. O le o bu; a -tuchaa mu mkporo; ?a tuhunuru ozi-õma ono mkporo? ¹⁰ Noo g'o gude mu gude k'ehu ndu Chileke hotaru atagbukota iphemiphe ono le nshi; oo ya bu ge Chileke eshikwanu leka Kéreshi dzokwaa phe pho; shi egube ono nu phe ndzu ojejeje, du biribiri. ¹¹ Opfu-a be bukwa opfu, e gude eka, pfuru su:

O -buru l'anyi le Kéreshi
 be tukoru nwuhukota
 be anyi l'ia
 a-tukokwapho
 nõdukota ndzu.

¹² O -buru l'anyi atagbukotaje
 iphemiphe le nshi
 be anyi le Jizosu
 a-tukokwapho buru eze.

O -buru l'anyi suru l'anyi
 ta amadu onye o bu
 be oo-sukwapho le
 ya ta amadu ndu anyi bu.

¹³ O -buru l'anyi ta
 apfushijedu ike l'iphe,
 anyi pfuru be yebedua
 apfushijekwa ike l'iphe,
 o pfuru.

Kele o to gbanwejedu iphe,
 o pfuru.

Onye e kweru l'oojerwe ozi ejerwe

¹⁴ Nyatajeru onyemonye iphemiphe ono; li nõduje l'iphe Chileke pfuaru phe iya pfushiaru phe iya ike su phe g'ephe ta nõdujekwa abaphe mba l'opfu, enwedu ishi. O to dukwa urwu du iya nu. O 'ekwapho emebyi be oomebyije ndu anu iya nu. ¹⁵ Kukebe ehugoshije phe le Chileke hukotawaru ngu ama bya agua ngu l'onye gbaru ke g'i jejeru iya ozi; mbu li bu onye-ozu, iphere ozi, ooje adudu; teme i buru onye anõduje ezirwe okpobe-opfu ono ezirwe. ¹⁶ Li zejeru onwongu gi ti yijeshi le ndu epfu mkpokoro opfu, bu iphe eswe. Noo kele egube opfu ono e-me ndu anu iya nu: ephe alaa azu azu; ephe te eyeheduru Chileke ubvu. ¹⁷ Iphe, ephe ezi aduje g'onwo, ababushi anu. Ndu haru yiru le ndu ono, epfu iphe ono bu Hayimeniyosu yee Filitosu. ¹⁸ Ephe gwobewaru etso okpobe-opfu ono;

kele epe suru le ndu nwuhuru anwuhu gbe shiwanu l'onwu teta dzuru ndzu. Epe gude egube ono nweru ndu ophu epe haru enwunga enwunga; gude nno nwufu phe lekwekwe ono, epe kweru ke Chileke ono. ¹⁹Qle okpa-ulo ono, shihuru ike ono, Chileke turu ono be bukwanu 'enwubata enwubata. Iphe-ohubama, Chileke deru l'okpa-ulo ono bu: Nnajiuphu maru ndu bu ndu nkiya. Iphe ozo, o dekwaru iya pho bu: G'iphe, bukpo onye suru le ya bu ke Nnajiuphu anyi; wofukwapho aka l'eme ejo-ipe.

²⁰“Eze-ulo, ha shii ta abuekwapho udu ite, du iche iche, e gude mkpola yeje ope, vu aswa kpa be aduje iya nu kpoloko. Iphe, a pyiru l'oshi me ophu a kpuru l'urwa adujechakwaa ya. Ndu aburu iphe, anodu akwabe ubvu; ndu abuerupho iphe, e gude eme iphe. ²¹Oo ya bu; o -buru l'o nweru onye safukotaru onwiya ejo-ipe ono, mu gushiru ono; o kwa iya bu l'onye ono a-buru ite, aakwabe ubvu ono, e doru nso o buru iphe, e gude ejeru Nnajiuphu ozi; teme edozia ya g'e gude iya jeje iphemiphe, du ree. ²²Oo ya bu; gbalajeru egu eme ejo-ipe ono, l'anoduje agu unwokorobya ono. Iphe, ii-mechia bu g'i buru onye pfuberekoto; l'i kweta ke Kereshi; nweru n-yemobu; nweru nchi-adu-doo unu le ndu ono, egudeje obu-iphoro akpo Nnajiuphu ono. ²³Te eyejekwa onu l'opfu ntumego eswe, enwedu ishi; l'i maanaru-a legube iphe ono be buepho uswo be e gudeje iya aswo. ²⁴L'onye-ozu ke Nnajiuphu be bufutajekwa onye ta aswojedu uswo; onye emejeru onyemonye odoo; onye maru g'ezije iphe; buru onye atajeru iphe nshi. ²⁵O bufutaje onye ewozeje onwiya ali; akpo-ziru ndu agbaje iya opfu agbagba uzo. Kele o nweru g'oo-me Chileke agbe yeru phe aka; izimanu ejo-ipe ono alwa phe azu; epe alwapfuta Chileke; epe abya amakotaru okpobe-opfu onoya. ²⁶Oo ya bu; enya abya ekosahu phe teke ono; epe emefu l'onya ono, Obutuswe nmataru phe onoya, bu iya shi mee phe: epe nodu eme iphe, bu uche Obutuswe onoya.”

Umere ndiphe le mboku ikpazu

3 ¹“Su-a; iphe lanu, ii-maru okpobe amaru bu l'o -rwuepho teke k'ikpazu be okpobe iphe-ehuka a-byakwa. ²Noo le teke ono be ndiphe a-bujeerupho onwophe be epe e-yeje obu kpoloko; epe aburu ndu nchamenya okpoga; buru ndu atu onu onwophe; buru ndu eku onwophe ekuku; buru ndu anoduje ephu ndu ozo iphu; ndu karikotaru ne le nna, nwuru phe nu aka; ndu amadu iphe-oma, e meru phe; ndu ta adudu iphe, adujeru phe le nso ememe. ³No iya; epe a-buru ndu nemadzu du ash; ndu iphe ta avujudu l'obu; ndu atukobeje nemadzu ibe phe iphe, o meduru; ndu te esedejedu onwophe; buru ndu eme enari; ndu iphe, du ree aduje ash. ⁴Epe a-buru o-deru-oye; buru 'anuma anuma phe; buru ndu etse etsetse; epe aburu ndu ka eye iphe-utso obu eme le Chileke; ⁵ndu anoduje eme g'ephe kweru ke Chileke l'ebe epe ekweta le Chileke ere ire. Jiko pakwaru egube ndu ono haa.

6“Ndu du nno be bu phe l'ahajeru abaphe l'ulo l'ulo edusweshi unwanyi, enwedu egomunggo; mbu unwanyi metawaru ejo-iphe; o kwowaru phe ehuh; iphe, l'alo-phu egube unwanyi ono buru egu ejo-iphe, dugbaa iche iche, anoduje agu phe nu. 7Egube unwanyi ono be onoduje eheshi ihee ike; mbu g'ephe nwuta iphe; ole ephe ta abyakwanu adu ike takebe marweta okpobe-opfu onoya. 8Ndu ono, l'anoduje eduphushi unwanyi ono be kwachiru okpobe-opfu ono uzo ge Jianesu yee Jiambirisu kwachiru iya Mosisu teke ndiche ono. Ephe bu ndu egomunggo phe dahuwaru adzulakpa; ekwekwe, ephe kweru be bu ekwekwe, daru l'eba l'enya ke Chileke. 9Ole ndu ono ta adudu aka ephe ejebebaaru; onyemonye atuko humakota l'ephe bu ndu eswe; mbukwapho g'onyemonye huma-dzuru le Jianesu yee Jiambirisu bu ndu eswe.”

**Okwa, Polu nmaru gude
kpochia ozi-a ishi**

10“Ole gubedua mawaru iphe, mu ezi; okpobe amaru; bya amaru ume-re mu; maru iphe, mu tuberu; maru ekweta mu; maru ge mu eheberu iphe-ehuka; maru n-yemobu mu; maru nshirima mu; 11maru mkpamehu ono, a kpakotakpooru mu ono g'o ha; mekpoo iphe-ehuka ono, mu jegbaberu onoya, bu iphe, tukoru dafpukota mu le Antiyoku; waa le Ayikoniyomu; waa le Lisutura. Su-a; mkpamehu, dafputakotaru mu nu ta abukwa iphe epfufu! Ole Nnajiuphu dzokotakwaru mu l'iphemiphe onoya. 12Mbu-a; iphe, bukpo ndu bu ndu oogu g'ephe le Kereshi Jizosu tugba buru nanu; g'ephe shi egube ono nodu ndzu, du Chileke ree be aa-kpakotakwa ehuh. 13Obenu le ndu bu ndu eme ejo-iphe; me ndu anoduje agho ugho; g'ephe ha be a-noduepho aka eji akaka eje l'eme ejo-iphe, ephe eme; ephe egude nno duphushia ndu ozo; ndu ozo eduphushikwapho ephebedua. 14Ole o bu; gubedua l'onwongu; pfushiekwapho ike l'okpobe-opfu ono, e ziru ngu ono, bu iya bu iphe, i kwetaru; opfu l'i makotaru ndu bu phe ziru ngu iya. 15Li nyatajekwapho l'i shi le nwata makotaru iphe, e deru lekwo-opfu Chileke. Oo iphe ono, e deru lekwo-opfu Chileke ono, du nsu ono be a-du ike mee ngu l'i nweru mmamiphe k'ophu Chileke e-shi lekwekwe, i kweru ke Kereshi Jizosu dzoo ngu. 16Iphe, bu iphe, e deru lekwo-opfu Chileke be shikotakwa l'eka Unme Chileke. O du ree legudeje zia okpobe-opfu ono; me g'e gudeje iya goshije nemadzu aka o meru eji; waa g'e gudeje iya agbazi egomunggo; waa g'e gude iya mefutaje nemadzu g'onye obu buru onye pfuberekoto l'iphu Chileke. 17Oo ya bu g'onye ke Chileke aburu onye a kwakobewaru okpobe akwakobe k'ejeru Chileke ozi ono, du ree ono, duru iya nu ono g'ooduhabe.”

4 1Su-a; mu noakwa l'iphu Chileke yee Kereshi Jizosu anmaru ngu okwa anmashiru ngu iya ike su ngu gi nyatakwa le Kereshi Jizosu ono, bu iya bu onye e-kpe ndu no ndzu me ndu nwuhuru anwuhu ikpe

ono a-lwakwa azu ujiku lanu bya egoshi l'oo ya bu eze. ²Sajekwa ozi-oma Chileke ono kpa a kpa; m'o du ndu iisaru iya nphe anuma-o; m'o bu l'o to dudu phe nphe-o; letaekwapho ozi ngu enya. Goshije nemadzu aka onye obu mesweru; bajeru onye meru eji mba; gudejekpoe kwapho ota-nshi meje g'obu shihu phe ike; ebe i hajekwa phe ezi iphe. ³Noo kele o nweru teke ndiphe e-mechaa jikaaaha okpobe-opfu ono, anyi ezi ono; o buerupho egu ejo-iphe, agu phe nu be ephe a-gbatsoru. Ephe achikoo ikpoto ndu ezi iphe ozo su g'ephe bya bya ezije phe iphe, atso phe utso le nchi anuma. ⁴Ephe te ekweedu angabe nchi lokpobe-opfu onoya. O buru ophu ephe anodu anga nchi bu ako-iphè. ⁵Ole-a; gubedua l'onwongu; sedekotajekwa onwongu l'iphemiphe ko; tajekwaru iphe-ehuka nshi; l'isà ozi-oma ono asasa; ejekota ozi, gbaru ngu nu; l'i bu onye-ozima ke Chileke.

⁶Le mbedua be bukwa iphe-ngweja; teme o gbabewaa mu l'alala. ⁷Mu lwakwaru okpobe ugu ono lwu-ghee. Mu jegheakwaru ozi mu. Mu pfushiepho ike lekwekwe, mu kweru ke Kereshi. ⁸Iphe, phoduru nu nta-a buwaa ge Chileke bua mu obunggo, o doberu mu; mbu le Nnajiuphu ono, lekpeje ikpe nhamunha ono be a-gu mu l'onye pfuberekoto mboku onoya. Mbu o to bulekwa mu-a kpurumu be oo-bu nggo ono; oo-bukota iya iphe, bukpo ndu gude obu phe go ha kwaberu abyabya iya.

Ozi, Pulu ezi Timoti k'iche

⁹Maekwarupho g'ii-me byapfuta mu ewegwa. ¹⁰Kele Dimasu be pakwaru mu haa tugbushia; kele iphe ke mgboko-a be ka iya ree eme le Chileke. Nta-a be o tugbuwaru jeshia Tesalonayika. Keresensu be jeru Galeshiya. Tayitosu jee Dalumesha. ¹¹Nta-a buwaa Luku kpoloko be mu ya no. Ge gu le Maku swikwaru jiko me i -byaje kele mkpa iya dukwaru mu shii; go bya eyetajeru mu aka. ¹²Tikikosu be mu ziru Efesosu. ¹³Teke i byajeru; chitakwaru mu uwe-ukpo mu pho, mu haru l'ibe Kaposu le Tirowasu pho. Li chitakwaru mu pho iphe, bukpo ekwo ono go ha; kekele ke ndu ophu e gude akpo-aturu mee. ¹⁴Aleguzanda ophu akpuje uzu be mekwaru mu ejo-iphe, ha shii. Oo Nnajiuphu be a-pfukota iya ugwo iphe, o meru mu. ¹⁵Kpakwaru iya l'aphara gubedua l'onwongu; lo kwatakwaru kwachia ozi-a, anyi ezi-a uzo.

¹⁶Edo mbu, mu vuchakpo uzo pfuru doo l'ulo-ikpe ono ta adukwa go ka mma l'oo onye lanu shi agba eyeru mu nu. Onyemonye tukoeurupho buhaa mu. Ge Chileke jiko ta agukwaru iya yeru phe lo bu iphe-eji, ephe mee ya. ¹⁷Oo Nnajiuphu be bu onye pfu-kube mu nu eyeru mu okpukpu ike; oo ya bu k'ophu mu e-zikota ozi ono go ha ge ndiphe mgburugburu numa-dzuru iya. O kwa iya pho bu onye nafutaru mu l'onu oduma. ¹⁸O kwapho Nnajiuphu ono be l'a-nafuta mu l'iphe, bukpo ejo-iphe mgburugburu ko; dua mu gele gele je edobe leka o bu eze l'imigwe. G'ajaja buru nkiya jasu le tuutuutu le mimiimii. Nokwa go du.

Ekele, Pọlu gude kpọchia ozi iya ishi

¹⁹Keleru mu Pyirisuka yẹ Akwila mẹ ndibe Onẹsiforosu. ²⁰Ẹrasutosu nọkwa ẹ Kọrentu. Tirofimosu bẹ mu hakwaru ẹ Militọsu; kele iphe eme iya. ²¹Kukebekwa ẹhu byaadaa tẹmanu l'o rwua l'udzumini. Yubulosu l'ekelekwa ngu rọ. O nọdu ekelekwa ngu phọ mbụ Pudẹnsu yẹ Layinọsu; yẹfua Kulọdiya; mẹwaro ẹnwunna anyi ndu ọphuu g'ẹphe ha.

²²Gẹ Nnajiuphu, bụ Jizọsu Kéreshi dobekwa ngu ndzụ-o. Chileke emeeru unu g'unu ha eze-iphe-ọma. Nokwa g'ọ dọ.